

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKI NAČELNIK  
OPĆINSKO VIJEĆE**

Broj: 01- /21  
Datum, 2021. godine

**NACRT**

Na osnovu člana 8. i 14. Zakona o komunalnim djelatnostima ("Službene novine ZE-DO kantona", broj: 17/08) i člana 14. Statuta Općine Tešanj ("Službeni glasnik Općine Tešanj", broj: 11/07), Općinsko vijeće Tešanj na svojoj \_\_\_\_\_ sjednici, održanoj \_\_\_\_\_ 2021. godine, donosi

**ODLUKA  
o vodovodu i kanalizaciji**

**I OPŠTI DIO**

**Član 1.  
(Predmet)**

- (1) Ovom Odlukom propisuju se uslovi snadbijevanja potrošača vodom za piće i odvođenje otpadnih voda, uređuje način eksploatacije, održavanja i korištenja sistema vodne infrastrukture (javnog vodovoda i javne kanalizacije) na području općine Tešanj, te izgradnje nove vodne infrastrukture, nadzor nad provođenjem odluke i kaznene odredbe.
- (2) Osim toga Odlukom se utvrđuju prava i obaveze JP "RAD" d.d. Tešanj kao davaoca usluga i potrošača kao korisnika usluga.

**Član 2.  
(Definicije)**

- (1) Pod sistemom javnog vodovoda podrazumijevaju se svi objekti javnog vodovoda za zahvatanje vode, crpna postrojenja sa pripadajućim uređajima, rezervoari i druga postrojenja kao i vodovodna distributivna mreža.
- (2) Pod sistemom javne kanalizacije podrazumijevaju se objekti javne kanalizacije, postrojenja i oprema koji služe za sakupljanje, odvođenje i prečišćavanje otpadnih voda.
- (3) Snadbijevanje vodom za piće čine usluge zahvatanja, kondicioniranja i isporuke vode za piće vodovodnom mrežom do mjernog instrumenta, uključujući i instaliranje i održavanje mjernog instrumenta i zaštitu izvorišta namjenjenog zahvatanju vode u cilju snadbijevanja vodom za piće.
- (4) Sakupljanje i odvođenje otpadnih voda čine usluge sakupljanja i odvođenja otpadnih voda iz domaćinstava i otpadnih voda nastalih tokom proizvodnog procesa sistemom javne kanalizacije do ispusta u recipijent, tretman i ispuštanje otpadnih voda i ispumpavanje, prijevoz i odlaganje sadržaja iz septičkih jama i drugih objekata za sakupljanje, tretman i zbrinjavanje kanizacionog mulja.
- (5) Odvođenje atmosferskih voda čini sakupljanje i odvođenje atmosferskih voda sa javnih i privatnih površina i dugih uređenih površina povezanih u javnu atmosfersku kanalizaciju ili odvedenih do najbližeg otvorenog ili zasvođenog vodotoka, te izgradnja i održavanje objekata i prirodnih vodotoka za prihvatanje i odvođenje bujičnih voda.

- (6) Vodnu infrastrukturu čine sistem javnog vodovoda i sistem javne kanalizacije. Pod pojmom javnog vodovoda i javne kanalizacije kao dijela komunalne djelatnosti, podrazumijeva se sistem kojim upravlja i koji održava javno preduzeće formirano od strane Općine Tešanj.
- (7) Investiciono održavanje predstavlja preventivno plansko izvođenje radova većeg obima na vodnoj infrastrukturi, sredstvima i opremi, kojim se u zavisnosti od vijeka trajanja, vrši zamjena dijelova vodne infrastrukture, opreme i sredstava u cilju njihovog dovođenja u stanje funkcionane spremnosti (svaka veća popravka/rekonstrukcija sistema javnog vodovoda i sistema javne kanalizacije - zamjena jedne ili više cijevi, armatura, uređaja i sl.)

### **Član 3.**

#### **(Izgradnja vodne infrastrukture)**

- (1) Izgradnja vodne infrastrukture (sistema javnog vodovoda i javne kanalizacije) vrši se na način i pod uslovima određenim pozitivnim zakonskim propisima.
- (2) Općina Tešanj na godišnjem nivou planira finansiranje izgradnje kapitalnih projekata u oblasti vodne infrastrukture (izgradnja novih vodovoda, vodozahvata/bunara, novih kanalizacija i sličnih projekata), u skladu sa raspoloživim sredstvima.
- (3) JP Rad Tešanj na godišnjem i višegodišnjem nivou planira finansiranje izgradnje kapitalnih projekata u oblasti vodne infrastrukture u skladu sa raspoloživim sredstvima.
- (4) Izgradnja vodne infrastrukture u mjesnim zajednicama koje su iskazale interes za prioritarnu realizaciju ovih projekata, realizuje se uz plaćanje uvećane priključne takse u iznosu od 1.500,00 KM.
- (5) Uvećana priključna taksa, iz prethodnog stava, plaća se unaprijed. Građani ovih mjesnih zajednica koji nisu iskazali interes za prioritarnu realizaciju ovih projekata, uvećanu priključnu taksu plaćaju u periodu od narednih deset godina od dana puštanja vodovoda u funkciju. Nakon isteka ovog roka priključna taksa plaća se u iznosu predviđenom u članu 11. ove Odluke.
- (6) Izgrađeni sistem javnog vodovoda i javne kanalizacije prenose se na održavanje, korištenje i upravljanje JP "RAD" d.d. Tešanj, na način i pod uslovima utvrđenim Ugovorom o prijenosu između investitora i JP "RAD" d.d. Tešanj.
- (7) Prilikom predaje na eksploataciju i upravljanje, Investitor je dužan predati i svu dokumentaciju o izgradnji vodne infrastrukture koja je pratila realizaciju projekta u skladu sa propisima koji regulišu ovu oblast, na dalje čuvanje i ažuriranje.

### **Član 4.**

#### **(Investiciono održavanje i zadržavanje)**

O investicionom održavanju vodne infrastrukture kao i načinu eksploatacije, stara se JP "RAD" d.d. Tešanj kojem su sistem javnog vodovoda i javne kanalizacije preneseni na upravljanje, odnosno za svu vodnu infrastrukturu za čiju upotrebu korisnici plaćaju naknadu.

### **Član 5.**

#### **(Proširenje i dogradnja)**

- (1) Pojedinačne slučajevne rekonstrukcije postojeće mreže kojom se pojačava i proširuje sistem vodne infrastrukture na manji broj objekata, kao što su pojedinačni objekti, nekoliko objekata u jednoj ulici i slične zahvate planira, finansira i izvodi JP "RAD" d.d. Tešanj.
- (2) U Planu iz prethodnog stava JP "RAD" d.d. Tešanj predviđjet će i stavku - sredstava za nepredviđene i neplanirane zahvate.

### **Član 6.**

#### **(Nivo vodnih usluga)**

- (1) Voda iz javnog vodovoda mora biti stalno pod sanitarno-higijenskim nadzorom i u pogledu kvaliteta odgovarati sanitarno-higijenskim uslovima i biti u skladu sa važećim Pravilnikom o zdravstvenoj ispravnosti vode za piće.
- (2) Za ispravnost vode u smislu prethodnog stava brine se i odgovorno je JP "RAD" d.d. Tešanj.

- (3) Za potrošnju vode iz javnog vodovoda i upotrebu javne kanalizacije, izuzev vode potrošene za požarne potrebe, za potrebe otklanjanja posljedica epidemije i druge vanredne situacije, korisnici plaćaju određenu naknadu.
- (4) Jedinične cijene za pružene vodne usluge JP "RAD" d.d. Tešanj utvrđuje primjenom Metodologije za formiranje cijena javnih vodnih usluga.
- (5) Cijene vodnih usluga utvrđene u skladu sa stavom 4. ovog člana, utvrđuje JP "RAD" d.d. Tešanj a saglasnost na Cjenovnik o pružanju javnih vodnih usluga daje Općina Tešanj.

## **II PRIKLJUČIVANJE NA VODOVOD I KANALIZACIJU**

### **Član 7.**

#### **(Obaveza priključenja)**

- (1) Svi građevinski objekti izgrađeni na području koje je obuhvaćeno javnim vodovodom mogu, na zahtjev korisnika, biti priključeni na javni vodovod.
- (2) Svi građevinski objekti izgrađeni na području koje je obuhvaćeno javnom kanalizacijom moraju se, najkasnije u roku od 60 dana, računajući od početka upotrebe ove mreže spojiti na kanalizaciju.
- (3) Način priključenja na javni vodovod, javnu kanalizaciju i hidrantsku mrežu definišu se u urbanističkoj saglasnosti.
- (4) Snadbijevanje vodom iz javnog vodovoda na području gdje nema kanalizacione mreže, može se dozvoliti samo pod uslovom da je prethodno obezbjedjena odvodnja otpadnih voda u vodonepropusnu septičku jamu, izgrađenu prema tehničkim normativima.
- (5) Po isteku roka iz stava 2. ovog člana nadležna općinska komunalna inspekcija naložit će vlasnicima građevinskih objekata spajanje na kanalizacionu mrežu.

### **Član 8.**

#### **(Priključci na vodnu infrastrukturu-vodovod i kanalizacija)**

- (1) Priključci na vodnu infrastrukturu vrše se u skladu s odredbama ove Odluke i Općih i tehničkih uslova priključenja na javni vodovodni/kanalizacioni sistem, koji čine sastvni dio ove Odluke.
- (2) Vodovodni priključak počinje od spoja sa sekundarnim cjevovodom i završava se u šahtu za vodomjer.
- (3) Kanalizacionim priključkom smatra se dio kanalizacione mreže od revizionog šahta na primarnom kolektoru sa sabirnim kanalizacionim oknima kućnih ili stambenih instalacija.
- (4) Za svaki objekat se instaliraju vlastiti priključni cjevovod, kao dio sekundarne vodovodne/kanalizacione mreže.
- (5) Izuzetno od prethodnog stava, za dvije ili više porodičnih stambenih zgrada sa po jednim stanom i malom potrošnjom vode, može se dozvoliti zajednički priključni cjevovod vodovoda/kanalizacije.
- (6) Za objekte kod kojih je projektnom dokumentacijom predviđeno snadbijevanje vodom za unutrašnju i vanjsku hidrantsku mrežu i sanitarne potrebe, u istom šahtu za vodomjer se instaliraju zasebno mjerenje potrošnje vode za hidrantsku mrežu i sanitarne potrebe.

### **Član 9.**

#### **(Prelaz preko tuđe parcele)**

U slučajevima kada je radi spajanja na vodovodnu ili kanalizacionu mrežu potrebno koristiti zemljište za koje nisu rješena imovinsko-pravna pitanja, zavisno od učesnika u ovom postupku, primjenjivat će se odredbe Zakona o eks propijaciji ili Zakona o stvarnim pravima.

### **Član 10.**

#### **(Odobrenje za priključenje)**

- (1) Priključak na vodnu infrastrukturu, na zahtjev korisnika vrši JP "RAD" d.d. Tešanj koje upravlja javnom vodnom infrastrukturom.
- (2) Prilikom izdavanja odobrenja za priključenje na vodnu infrastrukturu JP "RAD" d.d. Tešanj je dužno odrediti način, uslove, mjesto priključka, kao i odrediti lokaciju šahta za vodomjer, a

po izvršenom priključku ucertati priključak, šaht za vodomjer i druge podatke na kartu vodovodne i kanalizacione mreže.

- (3) Odobrenje za priključak na javnu vodovodnu i hidrantsku mrežu ne može se izdati ako se ne ugrađuje vodomjer.
- (4) U slučaju samovoljnog priključka korisnika na vodovodnu mrežu JP "RAD" d.d. Tešanj će izvršiti isključenje na teret korisnika i poduzeti ostale zakonom predviđene mjere.
- (5) U slučaju samovoljnog priključenja na kanalizacionu mrežu, JP "RAD" d.d. Tešanj će poduzeti zakonom predviđene mjere.
- (6) Objekti koji su priključeni na javnu kanalizaciju, a ne snadbijevaju se vodom iz javnog vodovoda, naknadu za korištenje kanalizacione mreže plaćaju paušalno na bazi prosječne godišnje potrošnje vode shodno kategoriji korisnika kojoj pripadaju, za godinu u kojoj se utvrđuje naknada.

#### Član 11.

##### (Priključna taksa)

- (1) Za priključenje na općinsku vodovodnu, hidrantsku i kanalizacionu mrežu svaki budući korisnik dužan je uplatiti taksu u korist Budžeta općine Tešanj. Priključak novih korisnika, JP "RAD" d.d. Tešanj će obaviti po prijemu dokaza o uplaćenju taksi ili dokaza o oslobađanju od plaćanja priključne takse.
- (2) Taksa se plaća po jednom priključnom mjestu i ne uključuje troškove priključka:

- a) za poslovne objekte u svojini pravnih lica, društava i drugih organizacija:

- priključak na vodovodnu i kanalizacionu mrežu .....	1.500 KM
- priključak na vodovodnu mrežu bez kanalizacije .....	1.000 KM
- priključak na kanalizaciju bez priključka na vodovod .....	500 KM

- b) za poslovne objekte u svojini fizičkih lica:

- priključak na vodovodnu i kanalizacionu mrežu .....	1.200 KM
- priključak na vodovodnu mrežu bez kanalizacije .....	800 KM
- priključak na kanalizaciju bez priključka na vodovod .....	400 KM

- c) za stambene objekte, domaćinstva:

- priključak na vodovodnu i kanalizacionu mrežu .....	800 KM
- priključak na vodovodnu mrežu bez kanalizacije .....	600 KM
- priključak na kanalizaciju bez priključka na vodovod .....	200 KM

#### Član 12.

##### (Oslobađanja od plaćanja priključne takse)

- (1) Od plaćanja priključne takse na javni vodovod i javnu kanalizaciju oslobođeni su:
  - a) javne ustanove čiji je osnivač općina, kanton, federacija ili država;
  - b) školski i vjerski objekti;
  - c) kolektivni centri i namjenski objekti izgrađeni za potrebe zbrinjavanja socijalno ugroženih kategorija korisnika;
  - d) lica/korisnici stalne socijalne pomoći, na osnovu uvjerenja Centra za socijalni rad da pripadaju toj kategoriji lica;

- (2) Ostvarena sredstva po osnovu odredbi člana 11. ove Odluke, koristit će se isključivo za proširenje kapaciteta vodovoda, poboljšanje kvaliteta vode, odnosno razvoj kanalizacione mreže. Namjenska upotreba sredstava bit će definisana i obezbijeđena kroz odluke o budžetu Općine i odluke o izvršavanju budžeta za svaku godinu pojedinačno.
- (3) JP "RAD" d.d. Tešanj će dva puta godišnje dostavljati izvještaj o izvršenim priključcima.

#### **Član 13.**

##### **(Dvojno napajanje vodom)**

- (1) Korisnicima individualnog stambenog objekta ili stambene zgrade, sa riješenim vodosnabdijevanjem iz sopstvenog vodovodnog uređaja, koji ostvare i pravo na priključak istog objekta na javni vodovod u skladu sa odredbama ove Odluke, zabranjeno je korištenje priključnog šahta za smještaj vodomjera i unutrašnjih (kućnih) instalacija za dvojno napajanje.
- (2) U slučaju definisanih radnji u prethodnom stavu, korisnici moraju imati za svaki vodni uređaj ili drugi izvor vodosnabdijevanja zasebne priključne šahtove, zatvaračke ventile i razvod unutarnjih instalacija zaključno sa zasebnim izlivnim mjestom (radi spriječavanja miješanja vode iz različitih izvora).

### **III ODRŽAVANJE SPOJEVA I INSTALACIJA**

#### **Član 14.**

##### **(Vodomjeri)**

- (1) Vodomjer je plombiran plombom Zavoda za mjeriteljstvo i patente BiH, i isti se mora baždariti u zakonom propisanom roku. Korisnici općinskog vodovoda plaćaju mjesečnu naknadu za baždarenje vodomjera.
- (2) JP "RAD" d.d. Tešanj je obavezno obezbjediti blagovremeno baždarenje ili zamjenu vodomjera.
- (3) Sve kvarove na vodovodnim i kanizacionim spojevima, korisnici su dužni odmah po uočavanju prijaviti JP "RAD" d.d. Tešanj koje je dužno odmah, a najkasnije u roku od 24 sata pristupiti otklanjanju kvara.

#### **Član 15.**

##### **(Održavanje spojeva)**

- (1) Sve promjene i popravke na vodovodnim, hidrantskim i kanizacionim spojevima vrši isključivo JP "RAD" d.d. Tešanj koje upravlja javnim vodovodom i kanizacionom mrežom.
- (2) Održavanje unutarnjih (kućnih) instalacija vodovoda i hidrantske mreže poslije vodomjera i zbirnog vodomjera u objektima su nadležnost i obaveza korisnika usluga, odnosno kućnog savjeta ili vlasnika individualnog stambenog objekta.
- (3) Unutarnje instalacije kanizacione čine instalacije do posljednjeg sabirnog kanizacionog okna unutar ili izvan objekta iz kog se kućna ili stambena interna kanizaciona mreža uvodi direktno u sabirno okno. Ove instalacije su u nadležnosti korisnika usluga, odnosno stanara zgrade ili individualnog stambenog objekta.
- (4) Instalacije kanizacione čine instalacije od prijemnog sabirnog kanizacionog okna iz kojeg je interna kanizaciona mreža uvedena u sabirno okno do primarnog kolektora.

#### **Član 16.**

##### **(Troškovi održavanja spojeva)**

- (1) Troškovi održavanja i popravke spojeva padaju na teret JP "RAD" d.d. Tešanj, izuzev ukoliko je do kvara došlo krivicom korisnika usluga, kada troškovi opravke padaju na teret samog korisnika.
- (2) Ako zbog neblagovremeno uklonjenog kvara na vodovodnoj i kanizacionoj mreži korisniku bude pričinjena šteta, JP "RAD" d.d. Tešanj je dužno korisniku istu nadoknaditi.

## IV ZAŠTITNE MJERE

### Član 17.

#### (Zabrane i ograničenja)

- (1) Zabranjeno je izvođenje bilo kakvih priključaka ili odvojaka ispred vodomjera bez prethodnog znanja ili pisanog odobrenja od strane JP "RAD" d.d. Tešanj.
- (2) Pravo otvaranja i zatvaranja zasunskih uređaja sa obje strane vodomjera ima samo JP "RAD" d.d. Tešanj koje upravlja javnim vodovodom.
- (3) Korisnik spoja može, izuzetno, zatvoriti zasunske uređaje iza spoja u slučaju kvara kućne instalacije, ali je o tome dužan u toku od 24 časa obavijestiti JP "RAD" d.d. Tešanj.
- (4) Korisnik spoja je dužan blagovremeno, preduzeti sve mjere da bi se vodovodni i kanalizacioni uređaji koji se nalaze na njegovom zemljištu zaštitili od kvara i bili u ispravnom stanju.

### Član 18.

#### (Šahtovi)

- (1) Šaht za smještaj vodomjera mora biti čist i suh, a vodomjer dobro izolovan i zaštićen od vanjskih uticaja (mraz i toplota), od uticaja površinskih i podzemnih voda kao i od mehaničkog oštećenja.
- (2) Šaht za vodomjer postavlja se u parceli, izvan objekta, na udaljenosti maksimalno 3 m od regulacione linije. Izuzetno, šaht se može izgraditi na većoj udaljenosti od 3 m od regulacione linije po tehničkim uslovima koje odredi JP "RAD" d.d. Tešanj.
- (3) JP "RAD" d.d. Tešanj prema vrsti priključka određuje tip šahta za smještaj vodomjera ili postavljanje/izgradnja novog priključnog kanalizacionog šahta na trasi kolektora, kao i vrstu poklopca u zavisnosti od potrebnog saobraćajnog opterećenja.
- (4) Pristup šahtu sa vodomjerom, mora uvijek biti slobodan.

## V NAKNADA ZA KORIŠTENJE VODE I KANALIZACIJE

### Član 19.

#### (Mjerenje potrošnje)

- (1) Mjerenje potrošnje vode vrši se ugrađenim vodomjerom.
- (2) Izuzetno, u slučaju kvara na vodomjeru, do ugradnje drugog vodomjera potrošnja vode se obračunava paušalno na bazi potrošnje korisnika u ranijem obračunskom periodu.
- (3) Komunalno preduzeće će korisnicima usluga vodovoda koji koriste zbirno brojilo obezbijediti mogućnost postavljanja pojedinačnih mjernih instrumenata, po principu jedan korisnik jedan mjerni instrument, kada korisnici stvore pretpostavke za prelazak na odvojeno mjerenje potrošnje i u skladu sa općim i tehničkim uslovima priključenja.
- (4) Novi stambeni objekti kolektivnog stanovanja saglasnost za priključenje na vodovodnu i kanalizacionu mrežu mogu dobiti samo ukoliko je ispunjen uslov da svaki potrošač ima vlastito brojilo.

### Član 20.

#### (Način obračuna i plaćanja naknade)

- (1) Usluge korištenja javnog vodovoda i kanalizacije ostvaruju se na osnovu zahtjeva/prijave koju korisnik podnosi JP "RAD" d.d. Tešanj.
- (2) JP "RAD" d.d. Tešanj izdaje odobrenje korisniku za korištenje instalacija javnog vodovoda i kanalizacije.
- (3) Naknada za utrošenu vodu obračunava se po utvrđenom cjenovniku za 1 m<sup>3</sup> vode a za korištenje kanalizacije, naknada se plaća na osnovu utroška vode.
- (4) Naknada za korištenje javne kanalizacije, za korisnike koji se snabdijevaju vodom iz vodovodnih sistema koji nisu na upravljanju kod JP "RAD" ili koriste vodu iz sopstvenog vodnog uređaja (hidrofori i slično), obračunava se paušalno shodno članu 10. stav 6. ove Odluke.
- (5) Plaćanje naknade za utrošenu vodu i odvodnju kanalizacije vrši se na osnovu mjesečnih akontativnih ili stvarnih računa.

- (6) Obračun utrošene vode koju plaća korisnik vrši se prema utrošenoj količini vode pokazanoj na vodomjeru (očitavaju se samo cijeli metri kubni).
- (7) Kada je u stambenim objektima kolektivnog stanovanja sa više stambenih jedinica, u kojima je obračun utrošenih količina vode vršen putem zbirnog mjernog instrumenta, izvršena ugradnja pojedinačnih mjernih instrumenata za svaku stambenu jedinicu, JP "RAD" d.d. Tešanj će i dalje nastaviti sa očitavanjem potrošnje na zbirnom mjernom instrumentu i eventualnu razliku u potrošnji između ukupne potrošnje sa pojedinačnih mjernih instrumenata i evidentirane na zbirnom mjernom instrumentu, dijeliti podjednako na sve korisnike srazmjerno pojedinačnoj potrošnji korisnika koji su koristili vodu mjerenu preko zbirnog mjerača.
- (8) U objektima kolektivnog stanovanja u kojima su postavljeni pojedinačni vodomjeri, obračun utrošene vode se vrši na osnovu pojedinačnog vodomjera korisnika. Razlika količine utrošene vode na zbirnom vodomjeru će biti obračunata korisnicima koji nemaju ugrađene pojedinačne vodomjere po članu domaćinstva u maksimalnoj količini od 5 m<sup>3</sup> mjesečno po članu domaćinstva. Eventualna razlika količina biće raspoređena proporcionalno količinama utrošene vode kod svakog korisnika.
- (9) Obračun utroška količine vode mjerene putem zbirnog mjernog instrumenta, vrši JP "RAD" d.d. Tešanj prema zvaničnom spisku koji je dužan sačiniti i dostaviti predstavnik Skupa etažnih vlasnika zgrade ili dugo lice izabrano od strane etažnih vlasnika zgrade.
- (10) U slučaju da u toku obračunske godine, dođe do promjena stanara ili članova domaćinstva zgrade, predstavnik Skupa etažnih vlasnika zgrade ili dugo lice izabrano od strane etažnih vlasnika zgrade, dužan je promjene prijaviti JP "RAD" d.d. Tešanj u pisanom obliku, u roku od 15 dana od dana nastale promjene. Zvanični spisak treba da sadrži: ime i prezime nosioca porodičnog domaćinstva, adresu i broj stana i broj članova domaćinstva.
- (11) Ukoliko se radnje iz prethodnog stava ne obavljaju redovno, utrošena količina vode prema očitavanju zbirnog mjernog instrumenta, se dijeli i obračunava shodno ranije dostavljenom spisku.
- (12) Vlasnik stambene jedinice u okviru stambenog objekta kolektivnog stanovanja prilikom nabavke, ugradnje, eksploatacije i funkcionisanja mjernog instrumenta potrošnje dužan je da se pridržava projekta o tehničkoj izvodivosti, izrađenog i ovjerenog od strane ovlaštenog stručnog pravnog ili fizičkog lica.

#### **Član 21.**

##### **(Promjena korisnika)**

- (1) U slučaju promjene korisnika općinskog vodovoda i kanalizacije, mora se podnijeti JP "RAD" d.d. Tešanj pismena prijava u roku od 15 dana od dana nastanka promjene.
- (2) Sve dok se ne izvrši promjena ranijeg i prijava novog korisnika, raniji korisnik i dalje ostaje u obavezi prema JP "RAD" d.d. Tešanj.

#### **Član 22.**

##### **(Očitavanje vodomjera)**

- (1) Svaki korisnik vodovoda je dužan da službenom licu omogući očitavanje stanja vodomjera koje se vrši najmanje jednom godišnje.
- (2) U slučaju da se zbog propusta korisnika ne može izvršiti redovno očitavanje stanja vodomjera službeno lice će ostaviti pismenu poruku u kojoj će navesti dan i čas ponovnog očitavanja vodomjera.
- (3) Ako se ni tada ne bude moglo očitati stanje vodomjera, utrošak vode će se obračunati paušalno na bazi potrošnje korisnika u ranijem obračunskom periodu, a tačan obračun izvršit će se kod slijedećeg očitavanja vodomjera.

#### **Član 23.**

##### **(Ispravnost vodomjera)**

- (1) O ispravnosti vodomjera dužno je brinuti JP "RAD" d.d. Tešanj u skladu sa odredbama Zakona o mjeriteljstvu u FBiH.
- (2) Na zahtjev korisnika JP "RAD" d.d. Tešanj dužno je da ispita ispravnost vodomjera i da najkasnije u roku od 15 dana ugradi kontrolni vodomjer. Ako se ustanovi da je vodomjer

ispravan troškovi postavljanja, kontrole i skidanja vodomjera padaju na teret korisnika u suprotnom troškovi opravke i kontrole padaju na teret JP "RAD" d.d. Tešanj.

#### **Član 24.**

##### **(Otkazivanje priključka na vodovod i kanalizaciju)**

Korisnik može pisanim putem otkazati korištenje vodovoda i kanalizacije i to trajno i privremeno.

#### **Član 25.**

##### **(Slučajevi kada se ne plaća utrošak vode)**

Korisnik neće plaćati naknadu za utrošenu vodu ako je voda upotrijebljena za:

- a) gašenje požara iz javnih hidranata i za potrebe otklanjanja posljedica epidemije ili drugih vanrednih situacija,
- b) gašenje požara iz unutrašnjih hidrantskih instalacija, ako se takav utrošak vode prijavi organizaciji najkasnije u roku od 24 časa nakon požara.

#### **Član 26.**

##### **(Javne česme)**

- (1) Za opštu upotrebu vode mogu se izgraditi javne česme koje se priključuju na javni vodovod. Javne česme moraju imati ugrađen, osim vodomjera i uređaj za štedljivo trošenje vode.
- (2) Organ uprave Općine nadležan za komunalne poslove određuje lokaciju javnih česmi, a utrošak vode iz javnih česmi pada na teret Općinskog budžeta.

## **VI KORIŠTENJE I OGRANIČENJE POTROŠNJE VODE**

#### **Član 27.**

##### **(Pravo na vodu)**

- (1) Svako pravo fizičkog i pravnog lica na vodu mora se koristiti na racionalan i ekonomičan način, čuvajući njezina prirodna svojstva i količinu s tim da se voda iz općinskog vodovoda u tehnološkim procesima koristi, u skladu sa postojećim mogućnostima, racionalno i u raznovrsne namjene, zadovoljavajući prvenstveno širi društveni interes i načelo održivog razvoja kojim se zadovoljavaju potrebe sadašnjeg i budućeg naraštaja da to pravo ostvari za sebe.
- (2) Niko ko ima dovoljno vode, posebno vode za piće, za sadašnje i buduće potrebe utvrđene za idućih 15 godina vodoprivrednom osnovom, ne može ometati i spriječavati druge da se u istoj mjeri opskrbljuju vodom, posebno vodom za piće, a koji te vode nemaju nikako ili nemaju dovoljno.

#### **Član 28.**

##### **(Vanredne okolnosti)**

- (1) JP "RAD" d.d. Tešanj kao upravitelj javnog vodovoda u slučaju nastupanja neplaniranih ili neočekivanih poremećaja ili prekida u snadbijevanju vodom, dužno je odmah o tome pisanim putem obavijestiti nadležan organ za komunalne poslove općine i istovremeno preduzeti mjere za otklanjanje uzroka poremećaja ili prekida.
- (2) Nadležan organ za komunalne poslove po prijemu obavještenja postupit će u skladu sa odredbama Zakona o komunalnim djelatnostima koje regulišu prekid pružanja komunalne usluge.
- (3) Za gašenje požara i za vrijeme drugih opasnosti Profesionalna vatrogasna jedinica za protivpožarnu zaštitu može koristiti vodu i za vrijeme trajanja ograničenja.
- (4) Profesionalna vatrogasna jedinica za protivpožarnu zaštitu je dužna za slučaj iz prethodnog stava voditi evidenciju o utrošku vode sa gradske hidrantske mreže i podatke redovno dostavljati JP "RAD" d.d. Tešanj na evidentiranje.



## Član 29.

### (Primjena blok rastuće cijene)

- (1) U slučaju vanrednih okolnosti za vrijeme trajanja ograničenja u vodosnabdjevanju, a u cilju obeshrabrivanja prekomjerne potrošnje vode JP "RAD" d.d. Tešanj može primjeniti blok rastuću cijenu vode uz obavezno mjesečno očitavanje vodomjera za odnosni period, uz prethodno pribavljenu saglasnost Općine Tešanj.
- (2) U slučaju kada je do prekomjerne potrošnje u vanrednim okolnostima došlo bez krivice korisnika, nakon izvršene prijave kvara, i utvrđivanja stanja od strane JP "Rad" d.d. Tešanj, korisniku će obračun potrošnje vode biti izvršen po važećem cjenovniku.

## Član 30.

### (Štednja vode)

Zavisno od potrebe, JP "RAD" d.d. Tešanj može izdati uputstvo o štednji kojeg su se dužni pridržavati svi korisnici vode.

## Član 31.

### (Isključenje vode)

JP "RAD" d.d. Tešanj može isključiti/zabraniti potrošnju vode pojedinim korisnicima u slijedećim slučajevima:

- a) kada se dosadašnji korisnik odjavi a novi nije podnio prijavu za korištenje,
- b) kada nastupi veći kvar na kućnim instalacija i uređajima, a u cilju otklanjanja kvara,
- c) kada stanje kućnih instalacija i uređaja ugrožava zdravlje korisnika, odnosno kada kvalitet vode na javnom vodovodu ne odgovara sanitarnim uslovima,
- d) kada je šaht za smještaj vodomjera zagađen ili zatrpan, odnosno nepristupačan a korisnik i pored pismene opomene JP "RAD" d.d. Tešanj nije ništa preduzeo da se stanje izmjeni,
- e) ako se korisnik ne pridržava uputstva o štednji vode za vrijeme trajanja ograničenja potrošnje vode. Ponovno priključenje isključenog korisnika će biti izvršeno nakon podmirenja cjelokupnog duga, troškova isključenja i ponovnog priključka te plaćenog prekršajnog naloga,
- f) ako više korisnika jednog objekta ne odrede između sebe nosioca pretplate za vodu,
- g) ako korisnik ne plaća potrošnju vode tri mjeseca uzastopno, JP "RAD" d.d. Tešanj će mu izvršiti isključenje vode, a ponovno priključenje će biti izvršeno nakon podmirenja cjelokupnog duga i troškova isključenja i ponovnog priključka,
- h) ako se u objektu, koji je priključen na javni vodovod, ustanovi da su korisnik ili više korisnika iz objekta izvršili radnju suprotno odredbi člana 13. ove Odluke,
- i) ako se korisnik stambenog, privrednog ili drugog objekta ilegalno (bez odobrenja i znanja JP "RAD" d.d. Tešanj ) priključi na instalacije javnog vodovoda i kanalizacije.

## VII NEDOPUŠTENE RADNJE

## Član 32.

### (Nedopuštene radnje)

- (1) Zabranjeno je uzimanje vode sa uličnih hidranata općinskog vodovoda osim slučaja požara i za potrebe otklanjanja posljedica epidemije ili drugih vanrednih situacija.
- (2) Zabranjeno je uključivanje kućnih i drugih kanalizacija u ulične slivnike.
- (3) Zabranjeno je u općinsku kanalizaciju preko kućne instalacije ili uličnih slivnika i silaza ubacivati smeće, pepeo, gips, cement, pijesak, otpatke, led, snijeg i druge čvrste materije i predmete.
- (4) Zabranjeno je, smeće i druge otpatke, preostale nakon čišćenja ulica i drugih javnih površina ubacivati u ulične slivnike i šahtove.
- (5) Zabranjeno je ubacivati u ulične slivnike i šahtove, zapaljive materije ili predmete koji mogu izazvati požar, eksploziju ili oštetiti kanalizaciju i otežati njeno funkcionisanje.
- (6) Hemikalije i druge tekućine koje sadrže škodljive (isparljive) materije, kiseline, alkalije ili soli ne smiju se ispuštati u kanalizaciju.

- (7) Izuzetno, tehnološka voda koja je upotrebljavana u parnim kotlovima ili zanatskim i industrijskim radionicama kao i druge otpadne vode iz ovog člana, mogu se ispuštati u kanalizaciju samo po odobrenju JP "RAD" d.d. Tešanj.

## VIII NADZOR NAD PROVOĐENJEM OVE ODLUKE

### Član 33.

#### (Upravni nadzor)

Upravni nadzor nad provođenjem odredbi ove Odluke provodit će resorne službe Općine Tešanj.

### Član 34.

#### (Inspeksijski nadzor)

- (1) Inspeksijski nadzor nad provođenjem odredbi ove Odluke provodit će komunalno-putna, sanitarno-vodna i građevinska inspekcija Općine Tešanj, svako u okviru svoje nadležnosti.  
(2) Žalba protiv rješenja nadležne inspekcije ne odlaže izvršenje rješenja.

## IX KAZNENE ODREDBE

### Član 35.

#### (Novčana kazna za pravno lice)

- (1) Novčanom kaznom od 1.000,00 do 3.000,00 KM kaznit će se za prekršaj JP "RAD" d.d. Tešanj ako:
- a) ne postupa u skladu sa članom 4.,
  - b) ne postupa u skladu sa članom 5.,
  - c) ne postupa u skladu sa članom 6. stav 2., i 5.,
  - d) postupa suprotno članu 7. stav 1. i 4.,
  - e) ne postupa u skladu sa članom 10.,
  - f) ako postupa suprotno članu 11. stav 1.,
  - g) ne postupa u skladu sa članom 12. stav 3.,
  - h) ne postupa u skladu sa članom 18. stav 2. i 3.,
  - i) ne postupa u skladu sa članom 19.,
  - j) ne postupa u skladu sa članom 20. stavovi od 2., 4., 6. do 9.,
  - k) ne postupa u skladu sa članom 22.,
  - l) ne postupa u skladu sa članom 23. stav 2.,
  - m) ne postupa u skladu sa članom 28. stav 1.,
- (2) Za prekršaj iz prethodnog stava kaznit će se i odgovorno lice u pravnom licu novčanom kaznom u iznosu do 200,00 do 1.000,00 KM.

### Član 36.

#### (Novčane kazne za potrošače/investitore)

- (1) Novčanom kaznom od 300,00 do 1.500,00 KM kaznit će se za prekršaj potrošač/investitor ako:
- a) ne postupa u skladu sa članom 7. stav 2.,
  - b) ne postupa u skladu sa članom 13.,
  - c) ne postupa u skladu sa članom 14. stav 3.,
  - d) ne postupa u skladu sa članom 15. stav 1.,
  - e) ako postupa suprotno članu 17.,
  - f) ne postupa u skladu sa članom 18. stav 5.,
  - g) ne postupa u skladu sa članom 20. stav 9., 10. i 12.,
  - h) ako postupa suprotno članu 21.,
  - i) ako ne postupa u skladu sa članom 22. stav 1.,
  - j) ako postupa suprotno članu 31.,

- (2) Ako je potrošač/investitor pravno lice, za prekršaj iz prethodnog stava kaznit će se novčanom kaznom od 1.000,00 do 3.000,00 KM, a odgovorno lice u pravnom licu novčanom kaznom od 200,00 do 1.000,00 KM.

## **X PRIJELAZNE I ZAVRŠNE ODREDBE**

### **Član 37.**

#### **(Usvajanje Općih i tehničkih uslova priključenja)**

- (1) Opće i tehničke uslove priključenja individualnih objekata i objekata kolektivnog stanovanja na javnu vodnu infrastrukturu, u skladu sa odredbama ove Odluke, predložit će JP "RAD" d.d. Tešanj u roku od 3 mjeseci od dana usvajanja ove Odluke. Nakon usvajanja od strane Općinskog vijeća Tešanj, Opći i tehnički uslovi priključenja predstavljaju sastavni dio ove Odluke.
- (2) Do usvajanja općih i tehničkih uslova iz prethodnog stava, primjenjivat će se postojeći Opći uslovi za priključenje objekata na javnu vodnu infrastrukturu.

### **Član 38.**

#### **(Prestanak važenja)**

Stupanjem na snagu ove Odluke prestaje da važi Odluka o vodovodu i kanalizaciji ("Službeni glasnik Općine Tešanj", broj: 10/05, 4/09, 4/11 i 5/11).


### **Član 39.**

#### **(Stupanje na snagu)**

Ova Odluka stupa na snagu narednog dana od dana objavljivanja u "Službenom glasniku Općine Tešanj".

**PREDSJEDAVAJUĆI VIJEĆA**

Amir Kurtić, dipl.ing.elteh.



## Obrazloženje

### PRAVNI OSNOV

Pravni osnov za donošenje Odluke o vodovodu i kanalizaciji sadržan je u odredbama člana 8. i 14. Zakona o komunalnim djelatnostima ("Službene novine ZE-DO kantona", broj: 17/2008).

### RAZLOZI ZA DONOŠENJE

Postojeća Odluka o vodovodu i kanalizaciji na snazi je od 2005. godine. U primjeni je pretrpjela tri izmjene, 2009. i 2011. godine. U proteklom periodu od petnaestak godina, u primjeni Odluke uočena je potreba za dodatnim uređivanjem određenih odnosa i radnji, te zbog izmjenjenih okolnosti u relativno dužem vremenskom periodu došlo je do određenih promjena po pitanju funkcionisanja i uređivanja međusobnih odnosa između Općine Tešanj i njenog javnog komunalnog preduzeća a zbog potrebe boljeg uređivanja odnosa komunalnog preduzeća i potrošača.

Kroz realizaciju MEG projekta, uz saglasnot Općinskog vijeća, potpisan je ugovor o regulisanju međusobnih odnosa u oblasti pružanja vodnih usluga. Ovim ugovorom Općina Tešanj i JP "RAD" d.d. Tešanj, prihvatili su da nastave dalju realizaciji ugovoreni obaveza uz redovno godišnje izvještavanje Općinskog vijeća o napretku u realizaciji Ugovora. Slijedom realizacije ovog Ugovora usvojena je Metodologija za formiranje cijena javnih vodnih usluga.

Osim toga, u primjeni postojeće Odluke otežana je primjena Odluke od strane nedležnih inspeksijskih organa zbog nedovoljno preciranih sankcija za nepoštivanje odredbi Odluke, pa je ovaj segment detaljno razrađen. Cjeneći sve ove okolnosti zaključeno je da se pripremi nacrt nove odluke i ponudi Vijeću na raspravu.

Odluka je pripremljena u skladu sa Jedinstvenim pravilima za izradu pravnih propisa u Zeničko-dobojskom kantonu. Osim toga pojedine odredbe su grupisane kao logičke cjeline u jedan član sa više stavova. U Nacrt odluke su ugrađene izmjene koje su usvojene u toku primjene postojeće Odluke.

Za pripremu Nacrta odluke Općinski načelnik je svojim rješenjem broj: 02-02-1-240/21 od 03.02.2021. godine imenovao Tim za pripremu Odluke od predstavnika Općine i predstavnika JP "Rad" d.d. Tešanj.

### Obrazloženje pojedinih pravnih rješenja:


- Članom 1. definisan je predmet odnosa koji se uređuju Odlukom;
- Članom 2. dodatno precizirane definicije pojedinih pojmova koji su korišteni u Odluci;
- Članom 3. regulisana pitanja izgradnje i primopredaje javne vodne infrastrukture; Stavom 2. dodatno precizirana uloga Općine kod realizacije kapitalnih projekata; Stavom 3. definisan način planiranja izgradnje vodne infrastrukture u JP "RAD" d.d.; Stavom 4. i 5. dodatno regulisani uslovi i način plaćanja uvećane priključne takse radi brže realizacije projekata vodne infrastrukture. U dosadašnjoj praksi za realizaciju ovih projekata gdje su mjesne sredine iskazale spremnost da svojim učešćem ubrzaju realizaciju projekata u svoj sredini, Općinsko vijeće je donosilo pojedinačne odluke za svaki ovakav projekat. Smatrali smo da je potrebno uspostaviti jedinstveno pravilo i propisati ga u ovoj Odluci, te tako eliminisati eventualno donošenje pojedinačnih odluka. Za realizaciju ove aktivnosti potrebno je izvršiti uplatu priključne takse prije početka realizacije projekta;
- Članom 4. definisano investiciono održavanje (preuzeto iz Ugovora o pružanju javnih vodnih usluga; Dodatno precizirano investiciono održavanje vodne infrastrukture čije korištenje korisnici

- plaćaju JP "Rad" i ista je u komunalnom preduzeću evidentirana u pomoćnoj knjizi neuknjiženih vodnih dobara;
- Članom 5. dodatno definisani slučajevi pojedinačnog proširenja i dogradnje mreže. Radi se rješavanju problema koji su se javljali u dosadašnjoj praksi. Naime pojedinačni zahtjevi za priključak ukoliko zahtjevaju rekonstrukciju postojeće mreže, trebaju se planirati u komunalnom preduzeću kako bi se mogla izvršiti potrebna rekonstrukcija radi budućih priključaka. Planovi komunalnog preduzeća treba da sadrže i jednu manju stavku sredstva za neke sitnije hitne intervencije za koje nije potrebna prethodna rekonstrukcija mreže kako bi se moglo intervenisati u slučaju potrebe;
  - Članom 6. definisan nivo vodnih usluga – standardi;
  - Članom 7. definisana obaveza priključenja na javnu vodnu infrastrukturu;
  - Članom 8. definisani uslovi priključenja na javnu vodnu infrastrukturu. U cilju preciziranja stvarne nadležnosti za održavanje pojedinih vodnih objekata a koji su se u dosadašnjoj praksi pokazali spornim i išli na štetu korisnika, bilo je potrebno jasno reći do koje tačke komunalno preduzeće održava vodnu infrastrukturu a šta je u nadležnosti vlasnika objekta;
  - Članom 9. definisan način rješavanja imovinsko-pravnih pitanja radi prelaska preko tuđe parcele za priključak na javnu vodnu infrastrukturu;
  - Članom 10. dodatno definisan način i uslovi priključenja na javnu vodnu infrastrukturu;
  - Članom 11. definisana priključna taksa;
  - Članom 12. definisana oslobađanja po osnovu plaćanja priključne takse. Dodatno precizirana prava oslobađanja za socijalno ugrožena lica;
  - Članom 13. definisano je dvojno napajanje vodom;
  - Članom 14. definisani vodomjери;
  - Članom 15. definisano održavanje spojeva. Dodatno definisane instalacije izvan objekta i unutrašnje instalacije kanalizacije i kanalizacioni spoj;
  - Članom 16. defisani troškovi održavanja spojeva;
  - Članom 17. definsane zabrane i ograničenja na javnoj vodnoj infrastrukturi;
  - Članom 18. definsani šahtovi;
  - Članom 19. definisan način mjerenja potrošnje;
  - Članom 20. definisan način obračuna i plaćanja naknade za korištenje vodnih usluga sa preciziranjem pojedinih odredbi. Dodatno izvršeno grupisanje pojedinih odredbi koje se odnosile na ovu tematiku a bile su grupisan u drugim tematskim cjelinama;
  - Članom 21. definisana obaveza prijave promjene korisnika;
  - Članom 22. definisani uslovi očitavanja vodomjera;
  - Članom 23. definisana ispravnost vodomjera i postupanje u slučaju pogrešnog mjerenja;
  - Članom 24. definisan način otkazivanja priključaka;
  - Članom 25. dodatno definisani slučajevi kada se ne plaća utrošak vode. Zakon o zaštiti od požara i vatrogastva FBiH i Pravilnik o tehničkim normativima za vanjsku i unutrašnju hidrantsku mrežu za gašenje požara definisao je ko je obavezan da kontroliše, ispituje, obezbjeđuje protok, proticaj i pritisak u hidrantskoj mreži. Voda je osnovno sredstvo za gašenje požara i hidranti su napravljeni i namjenjeni za zaštitu života i imovine;
  - Članom 26. definisane javne česme;
  - Članom 27. definisano pravo na vodu;
  - Članom 28. definano postupanje u vanrednim situacijama;
  - Članom 29. definisana zabrana upotrebe vode. U cilju discipliniranja nesavjesnih potrošača vode u vanrednim okolnostima, propisana je mogućnost uvođenja uvećanih cijena (blok rastuće cijene) i prije svega se primjenjuje radi stimuliranja štednje vode;
  - Članom 30. definisana štednja vode;
  - Članom 31. definisani slučajevi kada se voda može isključiti korisniku;
  - Članom 32. definisane nedopustive radnje na javnoj vodnoj infrastrukturi;
  - Članom 33. dodatno uključen upravni nadzor u provođenju odluke;
  - Članom 34. dodatno definisan inspeksijski nadzor u provođenju odluke;
  - Članom 35. dodatno definisane sankcije za JP "Rad" kod povrede pojedinih odredbi odluke;

- Članom 36. dodatno definisane sankcije za korisnike kod povrede pojedinih odredbi odluke;
- Članom 37. dodatno definisana obaveza donošenja Općih i tehničkih uslova kao jednog objedinjenog dokumenta. Sada su u primjeni Opći i tehnički uslovi posebno definisani za objekte kolektivnog stanovanja a posebno za individualne objekte. Samo jedan od ovih dokumenta (kolektivno stanovanje) čini sastavni dio postojeće odluke.
- Članom 38. definisan prestanak važenja postojećih propisa;
- Članom 39. definisano stupanje na snagu novog propisa.

**OBRADIVAČ**  
Služba za finansije, privredu, komunalne  
i inspeksijske poslove

Hamzalija, Hojkurić, dipl.ecc



**PREDLAGAČ**  
**OPĆINSKI NAČELNIK**

Mr. scđ. Suad Huskić

Broj: 02-02-1-240-2/21

Datum, 16.03.2021. godine

